

# Ipísshucheema

Wasina pakich kamanchinllpa yuwaa Papororini Ipísshucheem yandarangu anootsi

(Tayaspatampanirini kapitoto 19; mishat 20.13-38: natstangimasi.)

Papororini tuchip masach Ipísush taarangiya. Apanlee kuk tayaspatarangiya. Anush tputs zapani Isusoo mangoonarangana. Sheeru, zapishsha nllitarit tputs tayaspatapi átu naatarangiya. Itaru, Papororini uru kapung chinarangiya Ipísshucheetsi tputsi. Romshuch urkar Paporoo pangusush tumanarangu, Paporsha Ipísshuchee zuwanll wand nda mbizarangu, chinarangu, kirakaa yandarangiya. Yandayaru, Isus yiaa kapung chinakiya, tárangiya; mishat, wanasiriri taangtsa, tárangitamta; mishat, Isusumun yashingoo siyamari ksingtsa, tárangu, kirakamun yandarangiya wamkureema.

Ashiriya, na yuwaa kamanirangu anoo kamanchinllpa:

- A. 1.1-2: ¿Tamarimsa, Isuschichis?
- B. 1.3—3.21: Apanll iyaa ksumish chinaku, Isusumun iyaa kapung istarangiya.
- C. 4.1—6.20: Siy Apanlliticha wipis, ashiriy Apanll wip ashirus taangcha.
- D. 6.21-24: Siyaa ichingurootsis chinakina. Apanll siyaa ksumish chinaku, uru siyaa istachiya.

Na wapparee.

Tárangiya Papororini.

## Papororini Ipísshucheem tputs yandarangiya

**1** <sup>1</sup> ¿Zuwaa, tamarimsa Isuschichis; taaris?

Nuw Paportana. Apanll nuwaa ipusarangu, Isusoom tayaspatampanireem ínaranganda. Nuw watatana. Nuw siyaam Ipísshucheemis kirak yandayaruri, zangankina. Apanll siyaa waama tiptsi-reem ínarangu siyaa Isusoo mangoonarangus, nda sambaytaksa. <sup>2</sup> Aparich misha iy Kurakarini Isusu siyaa wanasiri napchiya; mangooz mapiyamaam siyaam panachiya atina.

<sup>3</sup> Apanll iyaa kizpur chinarangu, mangini kischea. Ashirucha, Apanlee: Apaa, shiy kizpurtishcha, atiniya. Shiyaa kizpur chinaktanicha. Shiy Isusoo ipartishcha. Iysha Isusoo kurakartanicha. Iparimunish iyaa shaanasha tiptsi-reemish ínarangsha. Iparish shiyash na taaku, iyaa urutama-ritam na istaku taakiya. Ashiriya, Apaa, wappari, mangini kis atiniya.

<sup>4</sup> ¿Tamaru Aparini iyaa chinaka? Ndatuma tsapurunasee tinachu uru iyaa waama tiptsireem ipusarangiya. Nuw tputsiri wanasirinandshaparee taachinllinpa, tárangu, yutaritshishirineetsini tachingarangiya. <sup>5</sup> Mishat, iyaa ksumish chinaku, waana iyangaz zandeeru, tputsee: Nuw shiyaa ipartana táchima, tárangiya. Táyaru, iyaa Isusumun wamin wipaampaz ashiru ínarangiya.

<sup>6</sup> Apanlee: shiyaa uru kizpur chinaktanicha atini, watam iyaa kapung istaranguwa. Iy nduntaa waritaranguni, yutaritaatani taaranguni, Apanll iyaa nayanirangu, istarangiya. Waanaatsi Wip kizpur chinarangitaa, iyaam tsipamaam zanganirangiya. <sup>7</sup> Ashirucha, na iyaa Isusumun ursiri Apanll iyaa yutaritshishirini ichinguru tachingarangu, Yashingoo iyaa itutsirangiya. Apanll waana iyaa mangutari istamaam zandarangu

ashirangiya. Iyaa kapung chinarangu, ashirangiya. Apanll waana zandarangu ashirangiya. <sup>8</sup>Anumunsha iwaz nda pakchiyam pachindarangiya iyaa istamaama. Iyaatssha, itsinsaru mangoonpana, átu, mangeetsini p'tseerangiya Isusoo kuk mangoonamaama. <sup>9-10</sup>Iyaa mangeetsini p'tseerangu, iysha mangoonarangiya, yuwaa sirútamasa Apanll tapachindampaneetsi zanganchima, tárangu anootsi. Sirú Apanll wipaa kamapshirangitaa, itaru yuwash waana zandarangu, iyaatssha mangeetsini p'tseerangiya. Yuwash zari waritarangu anush Wipaa tapachindampaneem inarangiya. Na Wipsha kizpur kurak wamari kasiru taakiya. Tsapurunasshuchee kasimbeeru, wansipicheetstam kasimbeeru, urutamari wamari kasiru taakiya. ¿Tamaru iyaa chinaka?

<sup>11</sup>Ashirucha, sirútama waana zandarangu, Waanaatsi Wip kurakaam ínchima átu, iyaatstam tiptsireem ipusarangitamta. Uru Apanll waana zandeeru, ashtachima, tárangu, <sup>12</sup>iyama, Utaáshuchimasini, Isusumun mangini taturanganiya. Apanllsha iyaa, wanasiri taapana átu, mangeetsini p'tseerangiya wipaa izuuru mangoonamaama, mishat wanasiritam taamaama. Anumandsha ayamtaati: Apaa, shiyaa kizpur chinaktanicha, táchiniya.

<sup>13</sup>Apanll siyaam arapcheetstamtis istaragitamta. Tputs siyaa k'kuzee zuramamshi kamanirangu, Isus iyaa tapachindamaam tsiparangu átu, Isusoo kuk mazarangus, siyaa mangoonarangtamsa. Mangoonarangus, Apanll siyash Waanaatsi Wani pshtarangiya; watam nuwaanshu tputsiri Kani tapshtuchima sirú, táranguwa. Nuwtanda tputsiri tápi átu siyash Wani pshtarangiya. <sup>14</sup>Waanaatsi Wani iyash tapshturangu, iysha urutamari Apanll tiptsir taachiniya. Nda ayamtaati iyaa kanatsipchiya. Apanll waana tiptsiree ichinguru waanpee naringachu, iyaatstam Isuschicheetsini naringachtamiya. Ashkachu iysha urutamari. Apaa, wapparee, wanip iyaa chinarangush istarangshawa, táchini.

<sup>15</sup>Ashirucha, tsiyatssee siyamun mazi-nayaruri, mangi kisha. Wandari Isusoo izuuru mangoonkana átssincha siyaatsi. Isuschicheewaatstam chinakana, átssincha. <sup>16</sup>Ashirucha, anoo mazaranguri, nuw mangi kis uru Apanllpa tsiyatkuri, Apaa, ¿tamaru shiy Ipísshuchee istarangsha? atina. Mishat, siyaam Apanll mashkina. <sup>17</sup>Tsiyatkuri, Apaa, shiy kizpur-tishcha atina. Shiyaatsimari chinakina; watam Ipareetsish iyaam zanganirangshawa Isusootsi. Ashiri Apaa, Ipísshuchee istangcha. Shaanaatstari mangoonamaam mangoom kapung panangcha. Mangoo p'tseengcha, Apaa, siyaam tsiyatkuri atina. <sup>18</sup>Mishat, Apaa, shaana tputsireemish Ipísshuchee ipusarangush, shiyash urutamari taachinllinpa. Mishat, iyaanpatatani Isuschichpatatani washunand kis shiyash shaniychinipa. Shiyash aranginashaparee taarasheemani wanasirimish panachsha, Apaa. Anoom mangoonamaam mangoozee p'tseengtamcha Apaa, atina. <sup>19</sup>Mishat, Apaa, wizpurireetsish mangoonchinllinpa. Tamarupa Ipareetsish tuwizpurtarangsha ashiritam tputsireetsish tuwizpurtangcha, siyaam mashkuri atina. ¿Apanll wizpuririni tamar! <sup>20</sup>Apanll waanpata wizpur Isusoo ituyumarangu, sheeru kanindap tunaringarangu, kizpur kurakaam inarangiya. Kizpur kurakaam inarangu, Na kayunu iyamari kasiyani, tárangiya Isusootsi. <sup>21</sup>Ashirucha, wansipcheewaatstam urkari kasirangiya; mishat tsapurunasshucheeaatstam urkari kasirangitamta. Kurak kapungooaatstaa, pakcheewaatstaa kasirangitamta. Kurak arangeem taarinaari ashiru, anootstam Isus kasirangitamta. Apanllimun wizpuririni Isus urutamari wamari kasiru taakiya. <sup>22</sup>Isus Waparimun wizpurini wamari kasirangu, Apanllsha, Na shiysha yaanaatsi tputsirini ksutangcha. Shiyaa ksutama-paneem ipuschinllinpa; tputsireemish kurak taachsha,<sup>a</sup> tárangiya wipaatsi. <sup>23</sup>Ashiri Isus iyaa tiptsireetseeru, iyaatssha tuwizpurtaku, iyash wamari kasiru taakiya.

<sup>a</sup> 1.20-22 Salmo 110.1 tsiyatsis nipta tatsamooru taaritamta.

Nllitarit ashimaam wanindaja. Isusumari kasiru urutamari taakiya. ¿Tamaru Apanll ashka? atashina.

**Minootssha kamanchintspa yuwaa  
Apanll iyaa Isuschicheetsini  
tapachindarangu anootsi**

**2** <sup>1</sup>Sirú siy tunaris Apanlle mapiyran-gsa. Yutaritaatsimari chinarangus Apanlle nda pakchiyam chinarangsa. <sup>2</sup>Anpuru Yashingchichish tputs kis tachitarangus, yutarit taarangsa. Yashing' kurakcha kizpuri. Siyaa kapunguri kasirangiya. Tputsee yuw Apanlle ngatkama anootstam ichinguru kamach-taktamta. <sup>3</sup>Ichinguruni ashimanandmun-ni. Mangich yutarit chinakich, nutsich támarakich, chaana zandkich anootsim tachitaranganiya. Ashirucha, Apanll iyamand yutaritshishirini tsiyantayaru, iyaa wanimaam waritarangiya. Tputsee ichinguru wanimaam waritarangiya.

<sup>4</sup>Iyaa wanimaam waritarangitaa, Apanll kchinamsheeru, iyaa nayaniyaru, kapung istarangu, <sup>5</sup>Wipamun taarashish urutamash iyaam panarangiya. Taara-sheemani kaneesich panarangiya. Ndun-taa waritaranguni, tsiparpaz ashiru nda chinaranguni, itaru Apanllsha iyaatssha ituyamakpaz ashirangiya. <sup>6</sup>Mishat, iyaa ituyamakpaz sheeru Wipapaz ashiru iyaa yuwar naringayaru, kurakaampaz ashiru iyaa ínarangiyaa. Iysha Isusumun kizpuritam taakaniya.

<sup>7</sup>Apanll Tputs ztaru nuwaa: Tamaru Apanll ashiranga, tápanda átu, iyaatssha tputseetsini chinarangus, Waanaatsi Wip iyaa tsipamaam zanganirangiya.

<sup>8</sup>Ashiriya, Apanll waana zandeeru, iy nduntaa Apanlle chinaruni taaku-ni, ashiritaa Isusoo zanganirangiya. Iyshacha Isusumun mangini tatkuni, Apanllsha iyaa mangutari tapachinda-kiya. <sup>9</sup>¿Nitaati yaanamuntaja wizpuri-rini kamungchini? nda. Waanari tputs: Yuwamunari nuw wanasir taaki anumu-naripa nuwaa tapachindachiya atinaa-riya, ¿tamaree anumun tapachindach? Isusumunaritcha tapachindachiya.

<sup>10</sup>Apanllimari tiptsireem ínakiya iyaatsi. Sirútamasa, Apanll mangush chinayaru, tputsiri wanasiri taapana átu, na in taa-rashish kaneesich anoom panakiya.

<sup>11</sup>Itaru, mbizarintspa; sirútama siy tunaris, Utaáshuchpatini Apanlleem yasamaam waritarangeezis. Utaáshuch siyaa, An tputs nda ktsupamcha; Apa-nlle kuk nda payukana, tárangana siyaatsi. Yuwamand nutseetsis nda ktsuparangus anumand Utaáshuch tputs siyaa natsarangana. <sup>12</sup>Siy Apanlle Ipusa-marini kuku nda mazarangus. Utaáshu-cheem saanaatsi ínamaam pinasarangsa. Utaáshucheem kinamaam pinasarangus, Apanll iyaa Utaáshucheetsini: Tapachi-ndachintspa, tárangu, iyaatsimari Utaá-shucheetsimari, tárangiya. Itaru, siyaa tunareetsis, tárangeeja, nduni. Ashiruch Apanlleem tiptsir kinamaam pinasara-ngis. Siy kaapa Apanlle nda mangoo-narangus, mapiyrangatasa. Ngutis taar ashirangsa. <sup>13</sup>Itaru, natsha siy Isusoo kuk mazarangus, siy tunarimuntaatis taarangus, natsha in siy iyapta Utaá-shuchpatini maachiritanicha. Isus iyaam ichinguroomani tsiparangu, ursirpat siyaatstam tachingarangiya.

<sup>14-15</sup>Isus, iyaanpatatini k'kuzee yarara-ngiya. Na minampazini ashiruni taakani-ya. Sirú, iy Utaáshuchini siyaa kundara-rimuntanicha. Iy Móysisarineetsi kuk payurangini; siyaa nda payurangus, anumand siyaa natsarangini. Itaru, Isus-sha kizpur kiyung kachiyeeru, iyamand chayarini tsiparangiya. Tsiparangu anu-mand na Apanll kamachtamarini iyaa nda kiyung yachakiya, watam kamach-tamarini wazapaneeeru payumaam pinasaranginiwa. Itaru, uwsha; Tsimbu-noo Utaáshuchheetstam, arapcheets-tam tputsireemi minamaritpaz ashiru ínchima átu, iyaam tsiparangiya. Ashiri Isusumunari iysha ichinguruni Apanllta-nicha tiptsiriniya. Iyaanpatatini china-kuni, kis taakaniya. <sup>16</sup>Isus yasinamun kiyung kachiyaru, tsiparangu, iyaats-sha natsshini kapeetarangiya. Mishat, yuwamand iyaam tsiparangu anumand

Apanllsha na iyaatssha kis chinakiya; iyaam waneeshish ndunshaparee. Ashiriya, iyaa ichinguruni Wapareem tiptsir ínarangiya. <sup>17</sup>Isus amb ashirangu iyaa Utaáshucheetsini: Nuw tputseem ichinguroom tsiparangina, ashiri siya arapchee tunaree natsarintspa, tárangeiya. Siyaatssha tunareetsis anootstam atiya: Siyaamtam nuw tsiparangitamana, ashiri na mapiyngtsa; tárangitamta siyaatsi. Ashiri na chinayasthiti taakaniya. <sup>18</sup>Isus iyaam ichinguroomani tsipayaru, ashirucha na Apanll Wani iyash ichingurushini taakiya. Apanllpa tsiyatamaam nda pazikurini kis tsiyatkiniya; xarashemani ndunshita. Apanll Wani iyash taaku, Apanllee iy washunanda Apartanicha tiniya.

<sup>19</sup>Ashikcha, zuwanllee. Sirú, siya Apanllee xapoorangitaatis, itaru natsha mangoonaksa. Mangooneerus, Apanll siyaatssha: Nuw siyaa tputsiritamana, tárangeiya. Ashiri na in washunandaritani ichinguruni Apanllshatanicha tiptsiriniya. Apanllee maachiritanicha ichinguruni.

<sup>20-22</sup>Ichtaru, Isus iyaam tsipangiya. Sheeru, Isusoo kuk iyaa kamanirangana Isusoo tayaspatampani. Sheersin, tputscha zapan mangooneersin, Apanlleem tiptsiri kinarangana. Ashiramchu, anu-mun siya tiptsireemtam kinarangsa. Itaru, ichinguruni minampazini ashiruni chinampanari taakiniya Apanlleema.

Napa: Iynaa washunandari Apanllpaz pangu minamtashuripaz ashiruni taakaniya, watam Apanll Wani iyash taakuwa. Isusumun pangukpaz ashkiniya. Isusumun tayaspatampan kuku, mishat Apanllimunatam kamanimapanimun kuku Apanlleem pangukpaz ashkiniya. Isus tayaspatampan Isusoo kuk patuzinazpaz ashku pashuchirangana. Sheeru, anu-munsha iwaz Isusoo kuk kaman kaman ashiranguni, misha chichirustakpaz, misha kamurikpaz, misha paxiztakpaz ashkiya. Ashikpaz ashkuni, mangoonaranguni, Isusumun aranganasha minamari pangukpaz ashiranganiya Apanlleema,

watam Apanll Wani tiptsirish taakuwa. Wanasiritam taakuni, Apanll iyash kis taatariya. Ashiriya, anuri mangoonangtsa. Apanllee kapung chinakuni iyaanpatatini chinayaniatina.

**Mishat, táchintspa yuwaa nuw siyaam tayaspatampaneem taakuri, siyaam Apanllpa tsiyatkina anootsi**

**3** <sup>1</sup>Ashirucha, yuwamand siyaa tayas-pataki anumand, nuwaa putayarusin, tumanaranganaya.

<sup>2-3</sup>Siy nuwaa yasakpasa. Apanll siyangaz tunareetsis chinarangu, nuwaatssha siyaa tayaspatamaam kamachtarangiya. Apanll: Nuwaa mangoonkusin nuwaana Kani tputsush tapshtuchima, Apanll, tárangeiya nuwaatsi. Nuwsha na siyaatsi anoo kamaneena, yuwaa Apanll sirú kamapshirangu anootsi. Anoo na siyaam pakich yandayana. <sup>4</sup>Ashiriya, siya kirakareetsi natstachus, yuwaa Apanll nuwaa: Tunareetstaa chinakina, tárangei anoo mangoonachpasa. Iparimuni mang' tatkusin nduntaa Utaáshuch tputsi, nuw tapachindapi tina, tárangeiya Apanlli nuwaatsi. <sup>5</sup>Apanll sirútama zitaminarineetsini anoo nduntaa kapung kamanirangu, itaru na in iyaatssha Isusoo tayaspatampaneetsini kamanirangiya. Apanll Wani mangeetsini p'tseerangu iysha yuwaa Apanll kapung chinarangu anoo mangoonarangtanicha. <sup>6</sup>Watacha yuwaa Apanll sirú pakich kamapshirangu anoo. Tunareewaatstam tputs tputsireemi ínchitamana, Apanll, tárangeiya. Utaáshuchpat minumaritpaz nutsasi ashiru kinachinllinaya, tárangeiya. Watam Ipari tputseem ichinguroom tsiparanguwa. Ashirucha, Ipareetsi mangooneersin, tunareewaatstam, nuwsha tputsireemi ínchima; urutamari kis chinachima, tárangeiya Apanlli.

<sup>7</sup>Ashiriya, Apanll waantari zandeeru, nuwaa istamapaneem ínarangu, kamachtarangiya, Shiysha tunaree tputs ichingurootssin kamanishini Ipareetsi kuku, nuwaa, tárangeiya. Apanll nuwaa kamachtakchu anshu nuwaam waana

wizpuririneetsi panarangiya. <sup>8</sup>Nduntaa nuw waritaruri, Apanll tiptsiri piyartacheewa nuwaa itsinsaru taamaam kasirangitaatsin, Apanll nuwaa kamanimapaneeem ipusarangiya. Na shiysha Ipareetsi kuk tunaree tputs kamanishini, tárangiya. Waamari Isus iyaa istarangu, ¿tamaree chiynaa anoo ashpa yashchich? Uw chínash kapungcha; itaru yuwaatsim yasari anoo kamankina siyaatsi. <sup>9</sup>Apanll sirútamasa wipapat maa-chee ichinguru tinarangu, tputseetstam tinarangiya. Yashing' tputsee tamapingarangitaa Apanll uru wipaatsi chinarangiya yashingoo kasimaama mishat tputsee itutsimaama. Anoo uru chinarangitaa, sirúta nda wazaree tputsee kamanirangiya. <sup>a</sup> Itaru, natsha wipsha kusarangu iyaa tayapstarangu, iysha yuwaa tayapstarangu anoo tputsee wazaree tayapstakitamaniya. <sup>10</sup>Iy na Apanllshatanicha tiptsirini. Iyamun, Apanll tiptsirimun Apanll wasundurur, mishat wasundurutam urkari, na mangoonkanaya yuwaa Apanll sirútamasa chinarangiu anootsi. <sup>11</sup>Yuwaa Apanll uruta tputsee Wipamun tapachindamaam chinarangiu anoo na mangoonkanaya. <sup>12</sup>Ashirucha, na iysha tputsini ichinguruni Isusumun mangini tatikuni, Apanllpat kis ipunkiniya, watam Wip tiptsiriniwa. Punimaam ndunari, pazimaam nduntamta. Kis Apanlle chinakaniya.

<sup>13</sup>Ashiriya, siya nuwangaz mangis mantsarintspa atina. Siyamand kaminis kiyung kachiykitaati, itaru anumand siya Apanlle mangoonaksawa. Ashiri siya nuwamun shambatangtsa, sambaytarintspa tina.

<sup>14</sup>Ashirucha, Apanll nuwaa tayaspatampaneem siyaam ínarangu, nuwsha uru siyaam Apanllpat tsiyatkina. Tutunlltayaruri, Apanlle: <sup>15</sup>Apaa, shiy tputseem ichinguru tinarangush, sundarureemtamtish tinarangush, shiyaa Apartanicha atina. Ashiri Apaa, Ipísshucheee istangcha; tina. <sup>16</sup>Watam shiy

nda pakchiyam xapookshawa, ashiri Ipísshucheem mashkina. Wizpurireetsish panangcha, Apaa. Ashkachush, uwshtisin shiyaa izuuru mangoonchinllinaya; shiyamun wizpurirish taachinllinaya; Apanlle tina siyaama.

<sup>17</sup>Isusumun izuureerus mangis tatkus, Isus uru siyash mangishis taachiya. Isusootsimarisha chinatssa. Mishat, Ipísshuch Isusoo izuuru chinakchusin, nda nllitari chinakchusin, Isusoo izuuru mangoonchinllinpa, atina siyaama. <sup>18-19</sup>Isus iyaa tamaru chinaka! Ksumish iyaa chinakiya. Itaru, wamari ashiru, ¿tamaree chiynaa tatsamchich? Ashiritaa, Isusoo chínash yasapana aturi, Apanllpat tsiyatkina. Ipísshuchsha mishat Isuschich tputs ichingurusin tamarupa Isus chiyaa chinarangiya, uwshtisin ashtaptamana; waanpatatin chinampatari chinaptamana, Apanlle atina siyaam mashkuri.

<sup>20</sup>Ashiriya, Apanll kizpurcha atina. Uw xaptareeja, nda. Waamari iyaa istamaam waritakiya. Chiynaa Apanlle mashkitaatini, itaru uwshacha yuwaatsitam nda chinarangini anootstam aranginasha istachiya. Iyash wizpuririni taaku, Apanll Wani iyash taaku Apanlle iyaa izuuru istachiya. <sup>21</sup>Ashirucha, anumandsha: Apaa shiyamari kasiksha, atiniya. Iparimunish iyaa istarangush urutamari shiyashchi tputs wappari Apaa táchinllinpa, watam iyaa tiptsireemish ínarangshawa, atiniya. Uru Apanlle ungirtakuni, wappari atiniya.

Ashiri yuwaa nuw siyaam tayaspatampaneem taaki anoo kamaneena.

**Mishat, nuw siyaa Isuschicheetsis atina; Wanasirinandaritis taangtsa; atina**

**4** <sup>1</sup>Nuw na Apanllimand kuk wamin tumanshishush taakina. Ashirucha, siyaa atina, Apanlle kuk payungtsa; minamari mangoos chinayarus taangtsa, atina, watam Apanllini tiptsiriniwa. <sup>2</sup>Saanpatatis chinayarus, istangtsa.

<sup>a</sup> 3.9 Daniela 3.9 tsiyatsis nipta tatsamooru taaritamta.

Tputs tsiyantakinaariya siya tsiyan-tarintspa, anpata wanasir tsiyatang-tsa. Saanpatatis chinakus taangtsa.

<sup>3</sup>Saanpatatis Isuschichpatatis chinamari ksarintspa ayamtaatiya. Minumari mangooz chinangtsa. Apanllimun Wani minampazis ashirus mapiyashtis taangtsa.

<sup>4</sup>Watom iy Apanllchichini Isusumun ichinguruni minampazini ashiruni taakaniwa. Mishat, Apanll Wani yuw iyash taaku anu minumaritamcha. Isusumun-ritam ichinguruni washunand Apanllish taachinipa. <sup>5</sup>Washunand minumari kura-kartanicha. Ichinguruni Isusootsimari mangoonkini. Ichinguruni Isusumun-ritam chumaranginiya. <sup>6</sup>Minumaritcha Apanlli, watach iycha Aparini wamari kasiru taaku anu, mishat iyash taaku anu. <sup>7</sup>Ashiriya, siya minumaritpaz ashirus taangtsa, átana.

<sup>7</sup>Isus waana iyaam wizpurireemani zapan wayakiya iyaanpatatini istamaama. <sup>8</sup>Watom Apanll kuk sirútari, táranguwa;

Nuw Ipari wamari kasiyaru, tputsee zapan itutseeru, nuwaanpee kanapuramchu, wizpurireetshiti Ipari tiptsi-reem zanganchiya; tárangiya Apanlli. Ashirucha, anuritam ashirangiya. <sup>9</sup>Isus Apanllish káyashinu, nish tsapush karuwarangiya. Sheeru, nish tsapush kapung kiyung kachiya-ranllu, mapuyaranllusin, itaru Apanll wipaa ituyumarangiya. <sup>10</sup>Sheeru wipsha Wapariptamta kanapeeranllu, wamarisha kasiru taakiya. Ashirucha, na ichinguruni tsapurunasshuchini Isusumun-riha wizpuririni taakani.

<sup>11</sup>Ashiriya, wizpuririneetsi waanchi-chitam zanganirangiya waanpatatin istamaama. Ashpatam Isus waana wámachtasheem ínarangiya. Mishat, ashpatam Apanllée kuk kamanimapan-eeem ínarangiya. Mishat, ashpatam Apanllée kuk xiympañeeem ínarangiya. Mishat, ashpatam Apanllchicheem ksuta-

mapañeeem ínarangiya. Mishat, ashpatam tputsee mang' tuwizpurampañeeem ínarangiya. Aranginasha ínat ínat ashirangiya. Waana kamachtaku, Isus ínarangiya zapani. <sup>12</sup>Nuw tputsiri waanpatatin istachinllinpa, mishat tayapstachinllinpa, átu ashirangiya Isusu. Waanpatatin istakinaariya ashiru nuwaa aranginasha mangoonachpasinaya atuparee ashirangiya. <sup>13</sup>Ashiriya, iysha yaanpatatini uru istakchuni, Isusoo izuureeshtini minamaritpaz ashiruni mangoonchiniya. Apanlleetsimarisha Wip chinachiniya. Ashkachuni Apanlleemarisha izuureeruni tachitchinipa; Apanll wip wamarisha iya kasichiya.

<sup>14</sup>Ashkachuni nllurpaz ashiruni nllit-tari mangush chinat, nllitari mangush chinat, ashishtar ndusha ashtachiniya. Mangini ndunpaz ashcheezini. Tputs mangooz tamamarpamaam nllitaritamash tayaspataku, iysha kukoo payucheezini. <sup>15</sup>Itaru, iyaanpatatini itsinsayashitini tsiyatikuni izuuru Isusoo kuk tuminchiniya. Anoomari yaanpatatini Isuschichpatatini chinakaniya, watom iy Isusoo kurakariniwa. <sup>16</sup>Ashiriya, watom Isus iyaam wizpuririnee iyaanpatatini istamaam wayaranguwa, ashiri ichinguruni yuwapaneeemari Isus iyaam ínarangu anpaneemari taakuni yaanpatatini kis istakuni washunand kis Apanllimun taachiniya. Iyaanpatatini chinachiniya. Ashiri shingtsa siya, nuw siyaa atashina.

**Ashiri mazinangtsa nuwaa kuki  
Isuschichis; Yutaritshishee izuuru  
ksangtsa, nuw siyaa tina**

<sup>17</sup>Na yutarit taakini an watsishaparee, nuw atina siyaatsi, watom Isus nuwaa tayaspampañeeem ínaranguwa. Yashingpazis ashirus taarintspa. Tputs ashkusin, miroosinllpaz ashirusin taakana. <sup>18</sup>Apanllée kuk nda mangoonkusin tapishpaz ashiru taakana. Apanllée ngatkusin, taarashée urutamash nda payukanaya. Yutaritshishingazimari uru

<sup>a</sup> 4.6 Malakiasa 2.10 tsiyatsis nipta tatsamooru taaritamta.

támaraksin, Apanllee izuuru ngatkanaya. <sup>19</sup>Apanllee watstaya, Chak ashish-tapa, atusin, yutaritshishingazimari kapung chinayarusin, mantsir taakana; pazikazinllinaja. Yutarit patatamamari chinayarusin, támaraksin, nda pakchiyam wanasir chinakanaya. <sup>20</sup>Itaru, siyaa Isusoo kuk mazarangus ;nitaati yutarit taangtsa ateeja? nda. Isus kuk: Wats-ta, yutarit taarintspa; atiya. <sup>21</sup>Nuw siyaa itsinsaru tayaspatarangina. Ichinguruni shaniyeeruni, kamanirangina Isusoo kuku. Nllitaritaa kamanirangeezi. <sup>22</sup>Taarasheetsis sirapchee chinarintspa; tárangina. Watam sirú piyari mangooz chinarangus, Taarashi wanasirparee, tárangus, saanaatsi ngutis ngichirang-sa. Aranginasha, aranginasha ashkus yutarit taaranga. <sup>23</sup>Itaru, na taarashish kaneesich anungazimari chinangtsa; siyaa tayapstakuri, tárangina. Mangis wanasirsha chinangtsa, tárangina. <sup>24</sup>Watam Apanll siyaa taarashee kaneesich panarangu, Nuwaana tamaparina ashirusin itsinsaru taachinllinpa átu, ashiranguwa.

<sup>25</sup>Ashiriya, itsinsarus tsiyatangtsa; ngichintspa. Watam iy ichinguruni Isuschichiniwa. <sup>26</sup>Mishat, tputsimun tsyantakinaareesa, saanaatstatam paptsa; tsyanpatis maarintspa. Natamta, musásiritam tsyianis zambazangtsa. <sup>27</sup>Tsyiantakus paptsa; Yashing' kasiyantspa, atina. <sup>28</sup>Mishat, washchiree: Watsta, sh'chirinllpa; atina. Yuw tputs sirú shuchimpan taarangu anoo: Na izuuru ksang-i, átana. Minganeetsish kapeeteerush, kuwiptish tarawaztayarush, kchitangi, átana. Tputs ashkachu, ndusha tputsee kiyung yachaku taachiya. Istampaneem-arishapa taachiya. Ashiriya, sh'chirintspa atina. <sup>29</sup>Mishat, yutarit zarungcharintspa; ayamtaati mantsir tsiyatcheezis. Itaru, wanasirinand tsiyatangtsa. Tputsee mang' p'tseengtsa; mangoonamaam istangtsa. Ashkachinaareesa, aranginashaparee Apanllee mangoonachpasa.

<sup>30</sup>Apanll waanaatsi Wani siyash pshtarangu, Na nuwtanda tputsiri; nuwash

urutamari taachinllinpa, tárangiya siyaa-tsi. Ashiri mantsiri tsiyatintspa watam Apanll Wani mangishis uru taakuwa. Apanll Wani mang' mantstapa, átana. <sup>31</sup>Ashiriya, natsamaam watsta atina. Tsiyantarintspa. Tsiyaneetsis kpitangtsa. Waratintspa. Tputsee ksatarintspa. Mishat, tputsee kamasintspa. Yutarit tsiyatintspa. Ashkus yutaritcha. Ashiri natsamaam watsishaparee. <sup>32</sup>Itaru, tputsee chinangtsa. Nayanikus, istangtsa. Siyaa tputs yutaritam inaktaa, itamsayarus chinangtsa, watam Apanll Isusumun siyaa chinayaru yutaritshishireetsis tachingaranguwa. Ashiri siyaa saanpatamtis chinangtamtsa, atina.

**5** <sup>1</sup>Ashiriya, Isuschichis, Apanllish tuminungtsa, watam Apanll tip-tsirsawa. <sup>2</sup>Chinampatari chinangtsa. Isus iyaa tamaranga chinarangu, siyaa tputsee ambtam shingtamtsa. Isus iyaa kizpur chinayaru, yutaritshishirineemani tachingamaam tsiparangiya. Nda tsipunoo pachindarangu tsiparangiya. Anumand Waparsha ksumish chinarangiya. Ashiriya, iysha ashchitamaniya Isuschichpatatini, watam Apanllini tiptsiriniwa.

<sup>3</sup>¿Tamaree Apanllchichich yutarit taachich? Ashiriya, imbangartamaam pakchiyam chinarintspa. Piyari mangooz chinamaam watstatamta. Mishat, maachtangazimari támaramaam watstatamta. Wanasir chinampanari taangtsa watam Apanllini wipiniwa. <sup>4</sup>Ashiriya, ¿mayaama mantsiri taamaam chinachich? Ashkuch an pazichpachi. Yutarit zarungcharintspa. Ngutis tamasing tamasing shirintspa. Anoo ayamtaati yusur chinarintspa. Itaru, Apanllee, wapparee, taangtsa yuwamand shiyaa yutaritshishee ichinguru tachingarangu anumanda.

<sup>5</sup>Ndunnaa yutaritshishee kasakus, Isusush nduntam pshtuchis. Tputs wandari yutarit patatamamari taaku, nda pazikusin, támarasheetsimari chinaku, ¿tamareeja Apanllee mangoonach? Apanllputseetsim chinaksin, ¿tamareeja

Apanlee mangoonach? Mangoonkeeja. Ashku anoo Apanllish watsapun pshtu-cheeja. Pinasakiya. <sup>6</sup> Ashiriya, tputssha siyaa nllitaritaa kuk tamapingayarusin, tayapstakinaariya, paptsa anoo mazinarintspa. Apanll anoo kuk natsakiya. Yuw tputs Apanlee ngatamamari taakana anoo nda yutarit wanichiya. <sup>7</sup> Ashirucha, nuw siyaa: Waash tchitintspa; táshina. <sup>8</sup> Sirú siy tunimushpaz ashirus taarantgasa itaru na in 'sinishsha taaksa. Apanll siyaa waama tiptsiri ínarangu, ashiri Apanll tiptsiri tamaparee ashirus 'sinishpaz ashirus taangtsa; wanasiriri taangtsa, atashina.

<sup>9</sup> Apanll kuk mangishis 'sineekpaz ashirangiya. Apanll kuk iyaa: Uru saanpata-tis istangtsa; wanasiriri taangtsa; itsin-sashtis chinangtsa, atiya. <sup>10</sup> Yuw Apanll chinaku anoo izuuru sangtsa. Yasayarus, anurisha taangtsa. <sup>11</sup> Tputsush tunimush taakana anush tchitintspa. Itaru, wanasiriri taakun, tpozayarus, ksangtsa. <sup>12</sup> An tputs yutarit ashkana anoo ipishungakanaya. ¿Ashimaa tamaree tsiyatchich? Tsiyatkuč ksimunachpachi. <sup>13</sup> Itaru, ipishungayaritaatssin, iysha wanasiriri taakuni, tuwasineekpaz ashiruni tputs-sha ¿tamaki nuw yutarit ashki? átu, waanaatsi yutaritshishirineets yasachinllinaya. Yasakchusin, pazichshitisinaya. <sup>14</sup> Ashirucha, yaseekuni, atiniya;

Támangi; chiyzangi.

¿Mayaama yutaritshishee chinaksha?

Isus mangeetsish

watam tuwasinipi atuwa.

Yutaritshishee kasayarush,

Isusoo mangoonangcha;

atuni atiniya.

<sup>15</sup> Ashiri siyaa Isuschicheetsis, mangip-tis taangtsa, átana. Ngutis mangsharta-wis taarintspa. Itaru, Apanlee kuk payukus, mangipashtis taangtsa. <sup>16</sup> Watam natpuru yutaritshish pzapaneekuwa. Ashiri ngutis mantsirish xiytangat ashkus, zapshtarintspa. Apanlleetsimari

mangooneerus taangtsa. Wanasiri taangtsa. <sup>17</sup> Ashiri miroosinll tamaparee shirintspa. Mangipashtis taangtsa. Yuwaa-tsimari Apanll zandku anoo sangtsa. Yasayarus, tatsamooritam payungtsa.

<sup>18</sup> Karusamaam chinarintspa; kash kaseeyantspa. Ashkachus mangich tsípat ashku mantsir taakchi. Itaru, Apanlleetsimari Wani chinangtsa kis taamaama. Apanlee Wani: Nuwaa kasiyarush, machingandama; tángtsa. <sup>19</sup> Sheerus saanpata Apanlee kuk kis tsiyatangtsa. Apanlee ksatam seengtsa. Yaseekchus, kaapa mangiptartis chinayarus Isusoo seengtsa. <sup>20</sup> Mishat, ksari Apanll ungirtangtsa watam Isusumun iyaa istaranguwa. Uru, Apaa, wapparee; tángtsa nuw atina.

<sup>21</sup> Mishat, saanpata Apanllchichpatatis niyrintspa; kukoo ngatkus shirintspa. Isusoo chinakus, kis ayu tángtsa.

<sup>22</sup> Mishat, kizshitis, zaranlleetsis kuk kpitintspa, watam Apanll shingi atuwa. <sup>23</sup> Apanll kamuzaa wizanlee kasimaam wayarangiya. Sheertam Isusootssha iyaam tiptsireemani kasimaam wayarangitamta watam Isus tiptsireem tsiparangu tapachindaranguwa. <sup>24</sup> Ashku, iysha Isusoo kuk kis payukaniya. Ashiritam siy kizis zaranlleetsis kuk kis payungtamtsa; kpitintspa.

<sup>25</sup> Mishat, nuw siyaa kamuzaatstis tina; Izanlleetsis chinangtsa. Watam Isus iyaa ksumish chinarangu nda waanaatsi watsipun pachindaranguwa. Ashiriya, siyaa ambtam ashiritamtsis izanlleetsis chinangtamtsa siya. <sup>26</sup> Napa ¿Isus iyaam tamarangeeja? Isus tputsireemi ínapí átu, iyaam tsiparangiya. Siyaa kamuzis izanlleetsis ambtam ashikpaz shingtsa chinakus. Watam yutaritshishirineetsini tachingamaam tsiparanguwa. Tputsiri nuwamun mang' tatkusin, Apareetsi kuk payuksin itsinsarsha taachinllinpa, táyaru ashirangiya. <sup>27</sup> Mishat, wanasirinandarisha taakchusin, yutaritshishee izuuru tachingama taakchusin,

<sup>a</sup> 5.15-16 Salmo 90.12 tsiyatsis nipta tatsamooru taaritamta.

nuwamun kissha taachinllinpa, táran-  
ngiya. Ashiruch Isus yusur kuskachu,  
wanasirinandarisha iyaa pangchiya.  
Ndusha pakchiyam mansir taachchi.  
Pazicheezini ndambaree. <sup>28</sup> Ashirucha,  
nuwsha siyaa atashina; Saanaatsi nutsis  
tamapari ashiru, izanlleetsis chinangtsa;  
kamuzaaatsis atina. Ashkachinaareesa,  
saanaatstam ungareem taatssa, watam  
minumpaz ashirus taaksawa. <sup>29</sup> ¿Nitaati  
tputs waanaatsi wanuts natsak? nda.  
Waanaatsi chinaku, wanasiri napkiya.  
Waanaatsi kis maritakiya. Ashiritam  
izanlleetstis ashikpaz shingtamtsa,  
wanasiritam ksutangtsa atina. Napa,  
Isus iyaa ashiritam wanasiri ksutkuwa,  
<sup>30</sup> watam Isus tiptsiriniwa. <sup>31</sup> Ashirucha,  
kizaa yamakus, izanllpatis minumari-  
paz nutsas kinarus, ashirus chinakus  
taangtsa, tina. Watam Apanll kuk zurku  
atuwa;

Tputssha kamuz uruta waparee,  
wanireetstam kasayaru, izuuru  
wizanllpatamarisha minumaripaz  
nutsas ashirusin taachinllinaya,<sup>b</sup>  
táranngiya Apanlli. <sup>32</sup> Itaru, nuwshacha  
átu anootstam táshina; Iysha itaru, Isus  
iyaa chinarrangu, minamaritpazini sheer-  
tamani Isuspat kinaranginiya, atina.  
<sup>33</sup> Ashirucha, zuwanlee, nuw siyaa  
tayaspatakuri, Saanaatsi izanllis chi-  
nangtsa; tina. Saanaatsi nutsis tamapari  
ashiritam chinangtsa.<sup>c</sup> Itaru, kizatamsin  
wazaranlleetssin kuk niyrusinpa, uru kis  
payuchinllinpa; atina.

**6** <sup>1</sup> Mishat, siy nlluris nuwaa kuki  
mazinantsa tina. Apareetsis kuk uru  
payungtsa; aneereetstamtis kuk payung-  
tamtsa. Apanlee chinakus shingtsa,  
watam ashkuch wanasiriwa. <sup>2-3</sup> Watam  
Apanll waana kamachtaku, tárannguwa;

Apareetsis wanasir ksutangtsa. Kuk  
payungtsa. Aneereetstamtish wana-  
sir ksutangtsa; kukoo payungtamtsa.  
Ashkinaareesa ashiru, ngutis tsipa-

cheezis. Wambari siyamari wachinaru  
taatssa,<sup>a</sup>

Apanll, táranngasha. Kamachtarangu  
anoo kis payuchchi, watam kiswa taat-  
ssa, tárannguwa. <sup>4</sup> Mishat, siyaa wachi-  
naatstis atina; Iporeetsis ngutaritis  
kiyung yacharintspa nda watsiyunpa  
taamaama. Iporeetsis chinangtsa. Tsiya-  
nuspat ipareetsis tsiyatintspa. Itaru, chi-  
nampatari tsiyatangtsa. Uru Isusoo kuk  
tayaspatangtamtsa atina. Ashkus an,  
iparis wanasiri kanungartachinllinaya.

<sup>5</sup> Mishat, na siyaa patatamapanis, mazi-  
nangtsa. Paturunareetsis kuk payungtsa;  
kpitintspa. Waneerundama átus wanasir  
ptatangtsa. Yuwartatam kamachtaku  
anuritam ptatangtsa. Tamarima Isusoo  
kuk payukus ashiritam paturunareetsis  
kuk payungtamtsa. <sup>6</sup> Tputsim paru, in  
tamaka patatku, tápanda átus ptatint-  
pa; saanitaritat ptatangtsa. Isusoo kuk  
kis payukus, ashiri paturunareetsis kuk  
ksatam payungtsa. <sup>7</sup> ¿Nitaati tputseema-  
ja patatkis? Isusoompaz patatkus ashik-  
sa. Ashiri paturunareetsis ksutkus, kis  
ptatangtsa. <sup>8</sup> Ndamba siyana yasasa, siy  
wanasirinaariya taakinaareesa ashiru,  
Isus yusur kuskachu, waana yasayaru,  
wanasiritam tuwapchintsa. Patatama-  
paneewaamtam tuwapchiya. Ichinguru  
tputsee tuwapchiya. ¿Nitaati tputschi-  
wa mamarapu? waana tatsamooru  
tuwapchiya.

<sup>9</sup> Mishat, nuw siyaa paturunaaatstis ata-  
shina; Tputsireetsis wanasiritam ksutang-  
tsa, tina. Isus tamapari ashirus wanasiri  
ksutkus shingtsa; atina. Nambanambtar  
shirintspa; natsarintspa. Watam siy kura-  
karis watacha Isusu. Patatamapanshiti-  
sin urkartamsincha Isusootsi. Kurakari-  
ni kanindush taaku tatsamooru tiptsiree  
ichingurootssin napkiya.<sup>b</sup> Ashiri tputsi-  
reetsis wanasiritam ksutangtsa atina.

<sup>10</sup> Ashiriya, siyaa Isuschicheetsis ichingu-  
rus táchintspa, Isusumunari kizpurtang-

<sup>b</sup> 5.31 Nishuri yuwartatam Apanll chtarangu 2.24 átu atitamta. <sup>c</sup> 5.21-33 Malakiyasa 2.16  
tsiyatsis nipta tatsamooru taaritamtá. <sup>a</sup> 6.2-3 Nishuri yuwartatam Tashitungarangu 20.12  
átu atitamta. <sup>b</sup> 6.9 Tayusima 10.17 tsiyatsis nipta tatsamooru taaritamtá.



*Romshuch sundar waratamaam shitu-  
ngachu izuuru yarkiya. (6.10-18)*

tsa. Sambaytarintspa. Isus siyaa wizpurireemis kapung panachintsa. <sup>11</sup> Apanllimun wizpuririni taakchus, Yashing' siyaa nda kasichintsa; siyamari kasitssa. Siyaa tamapingeeya atitaa, sambaytacheezis, ndambaree. <sup>12</sup> ¿Nitaati tputspataja waratkini? nda. ¿Nitaati tputseeja iyaa kapung kasimaam zandak? nduni. Yashing'tanda iyaa kasimaam zandku, yashing' iyaa natsaku, kasipi átu waratkiya. Yashingpatatam wasundururi waratkiniya, yashingpatatam urkar waratkiniya. Yuw tsapurunasshuchee ichingurusin kasikana watacha yuwapat waratkini anu. Kanindash kizpuritam taakana. <sup>13</sup> Ashirucha, Apanllimunari wizpuririni Yashingoo kasimaam chinangtsa, saanamunaris xapooksa. Apanllimunari wizpuririni taakus, Yashing' siyaa kizpuritaa kiyung yachakinaariya, siyaa sambaytakeezis. Apanllimun kizpur taatssa. Apanllimunari kasiyatssa. <sup>14</sup> Ashiri Apanllimun kizpurtangtsa, nuw siyaa atashina.

Izuureeru Apanlee wizpuririni payumaam kamanchintspa. Ichtaru, Isusoo kuk izuureerus mangoonangtsa. Mishat, wanasiriri taangtsa; yutarit taarintspa. <sup>15</sup> Mishat, yuwaa Isus chiya tapachindaku anoo izuureerus mangooneerus, mangooz mapiyus taangtsa. <sup>16</sup> Mishat, uru Isusumunari mangis tatungtsa; Isusoo ksarintspa. Ashkachus, siyaa Yashing' tamundat tumuntat ashkitaa, nda yutarit inchintsa. <sup>17</sup> Mishat, yuwaa Apanll: Siyaa tapachindayanllintsa, <sup>c</sup> tárangu anoo chinangtsa; mbizarintspa. Mishat, Apanll Wani waanaatsi kuk mangeetsis p'tseeku, izuuru mangoonkus anuri payungtsa. <sup>18</sup> Mishat, Apanlltam Wani mangeetsis p'tseekchu Apanllpat tsiyatangtsa. Uru Apanlee mashangtsa tputseema. Mangiptis, Apanll, shiyachchee tputs istangcha, tángtsa.

Ashiri Apanlee wizpuririni izuuru payumaam siyaa shingtsa.

Napa: ¿Romshuch sundar waratamaam tamarangeeja? Waratamaam shitungachu izuuru yarkiya. Tas tuwapi-mash kichpukiya. Sheeru, ngusambsha k'tuntakiya. Sheeru, mbammashhee spatakitamta. Sheeru, xanxapishsha payukiya kámanamaama. Sheeru, ngusambtam tutaykiya. Sheeru, mchitsha kayungumaam payurutaru waratamaama naakiya. Xunaru naamaam nda pakchiyam chinakiya. Ashiri siyaa ashikpaz shingtamtssa Yashingoom waratamaama.

<sup>19</sup> Mishat, nuwaamtam Apanlee tsiyatangtsa. Apanllpat tsiyatkus; Apanll, Paparoo istangcha, tángtsa. Mangoo p'tseengcha. Shiyaa kukish kamani-maam pazitpa, nuwaam tángtsa. Tá-kchus, nuwsha putit tamapari ashiruri tsiyatchina. <sup>20</sup> Isus nuwaa, Nuwaa kuki wayashincha; kamanishincha, tárangu-wa. Isus kuk wamin nuwaa tumana-rangandanaya. Itaru, siyaa Apanllpat nuwaam tsiyatkinaaris, nuwsha kurak tamaparee ashiruri, nda punikuri tayaspatachima.

<sup>c</sup> 6.17 Isáyaa 52.7 tsiyatsis nipta tatsamooru taaritamta.

Ashirucha, uru kizpurtangtsa; sambaytarintspa siyaa atashina.

<sup>21-22</sup>Na minootssha kamanchintspa. Zuwanlee Tíkiku siyap zanganchintspa. Nuwaa kuki mazinapana aturi, kamanishini táchina. Tsiyatsis ichinguru yasapana aturi siyap zanganchima. Nda kas yutakani anootstam ichinguru kamanishincha táchima. Uwsha kamankachu, mazinakus, ndusha nuwangaz mangis mantsatssa; mangis ksachshaparee. Zuwanlee Tíkiku kizpur chinakina. Tíkik Apanlee

kuk kis tputsee tayaspatakiya. Ashiriya, siyaa tayaspatakchu mangeetsis tuwizpurtachiya.

<sup>23-24</sup>Na nuw siyaa tina: Aparich siyaa Ipísshucheetsis chinaku, iy Kurakarini Isus siyaatstam chinaku, uru wanasi-ri istachintsa. Waanaatsi tiptsiri uru istakiya, waanamun mangis tatumaam uru istatariya, mishat saanpatatis chinamaam uru istataritamta. Siy Isusoo urutamari chinakus, ashiriya uwnasha urutanasha siyaa istachiya.

[Wapparee Ipísshuchis.]